

四庫全書薈要·乾隆御覽本

集部

御定歷代賦彙卷一百六

仙釋

紫元賦

宋 葛長庚

客此身於寰中兮如鸚鵡之樊籠妙此道於象外兮如  
鴻鵠之飛翮劃混沌於咸池兮呼飛廉而鞭豐隆謁元  
始於玉京兮騎汗漫而泛空濛帝宓犧而國華胥兮子  
栗陸而臣有熊家太極而亭寥泝兮女崑崙而塊衡嵩

師廣聃而鍊飛肉兮坐鶴脊以凌南華僕鬱壘而威幽

爽兮驅豕車而鎖北鄆兄羲和而嫂后羿兮縛妖星而

斬流虹友羅睺而媒太一兮躡梵雲而履剛風醉瑤池

以歌洞章兮曳王母之霓旌卧琪林以聽雲璈兮借玉

皇之羽籥嗟大道兮久聾數空華兮無窮滃紫陽之甘

露兮灑五苦之夜魂鼓朱陵之丹光兮煨三尸之異蟲

與造物兮翱翔並元氣而始終同大鈞兮笑語漱太液

之玲瓏以枸杞而為膾兮釘以靈阿之紫芝以茯苓而

為醞兮釀以真阜之赤松掬寒泉兮踞古澗採飛霞兮  
溯晴空製八錦兮尋偃月戲五禽兮舞神弓腰金璫而  
滕珂珮兮訪太微黃裳之翁養龍鉛而鍊虎汞兮運胎  
仙朱橘之功叩天谷兮臂赤鳳俯玄潭兮馭神龍泥丸  
氏兮長五解以云邈海瓊君兮眇大方其難逢追錢鏐  
兮跳入玉眸之庭弔偃佺兮橫跨流鈴之衝關曹溪兮  
認鷺鷥甃華池兮植芙蓉威音已魄兮瞿曇死達磨何  
之兮盧能春雪深兮二厥傳雷震兮五其宗槌拂語默



兮魄彼法之皮髓棒喝體用兮灑夫人之心胃谷神無  
聲兮與氣以相似禪河有涯兮問津之不同付萬物於  
一蟬兮殿五帝於靈臺了三世於半偈兮蟄百神於絳  
宮控黍珠兮抉難明笑螭蛄兮憶神農蹟哉大玄兮守  
之以礪微哉大易兮養之以蒙南柯歸來兮雖孔神而  
如幻蝴蝶栩栩兮剖藩籬而大通策三足之神鳥兮縹  
緲於空碧九鳳穆穆兮八鸞嚶嚶聲太霄景雲之鐘兮  
驚統閬苑金花之紅凭三級之朱樓兮望萬象於足下

而最太虛於目中如是而謂神霄之右卿青華之上公者也

金丹賦

宋 葛長庚

身木欲槁心灰已寒願飛昇於玉闕必修煉於金丹乾  
馬坤牛衛丁公於神室坎烏離兔媒姤女於真壇絳闕  
散郎清朝間士使扶桑青龍奮翅出火而華嶽白虎飛  
牙入水天爐地鼎三關造化之樞機月魄日魂一掬陰  
陽之精髓鉛裏藏汞中產金龜乃子交蛇乃午象兔

為郊畜雞為酉禽四象五行不離乎戊三元八卦當資  
厥壬朝既屯暮既蒙六爻有象夜必復晝必姤萬物無  
心由是三性會合攢簇元宮二氣升降盤旋黃道惟一  
味水銀纔變黑玉故七返朱砂乃成紅寶珠橘瓊榴交  
梨火棗普天白雪翩翩紫府之清飈滿院黃花隱映丹  
田之瑞草吾知夫抽添何物採取何地生殺有戶缺圓  
有時以浮沈為清濁之水以間隔明動靜之基養正以  
抱一持盈而守雌舉世無人能達此者終日枯坐不知

所之恩生害害生思房躔見昴主中賓賓中主斗度回  
箕嘗謂大道無言內丹非術玄珠垂象而陰裏抱陽德  
嬰兒結胎而雄中含雌質君臣之間先後悔吝夫婦之  
外存亡凶吉丁位之心癸位之張甲宮之女庚宮之畢  
形德生旺雖有否泰沐浴潛藏初無固必藥材助兩東  
西南北以歸中火候城池二八九三而為一如是則烏  
極河車百刻上運華池神水四時逆流榮衛寒溫而鷄  
火鬼井精神衰旺而玄朽斗牛子母函蓋身化心化兄

金史四庫全書  
卷一百六  
弟墳篋福修慧修六畫動爻見晦朔望弦之變一至改  
度有蝗蟲水旱之憂真人宇宙妙縱橫溪山歸掌握左  
軍右軍自古仁義大隱小隱從今宮角風悄悄月娟娟  
片雲孤鶴而長嘯一聲編書遺後學

燒丹竈賦

明  
李東陽

龍集載戊星杓指申玉扉薦爽金飈汎塵南州封君當  
弧懸之日綃夢之辰翠織蔥龍乎霧牖瑤環雜還乎雲  
苗野饋庭篚山藏海珍鳩杖主進錯然而前陳有一羽

客霓裳繡裾其容徐徐其步于于手并一器委諸坐隅  
封君曰此物奚形而焉取名胡為而至於吾庭也客曰  
昔者燧人鑽火神農制藥軒轅鑄器工倕操作是撥是  
斲爰究爰度乃采青丘之黝購雞山之腹掘海隅之楮  
糜蔥嶺之堊漬賁聞之涅鬪上申之砮採石髓於神峰  
浞益漿於帝壑擷玉榮於峯山擣沙磔於盧莫眇窮殊  
礫鉅撮碌璇旒埴陶坩抗埤煠璞斡旋蟻磨撐拄鼈足  
外陸內霽下承上覆其形則非誦非驚不齷不詭匪濶

以塗匪黜以黜劣屍為崇直梁為表弗薛而警弗窳而  
盾羶不沉於羊羹膏不沾於氣膳易牙之所不能用歐  
冶之所不得取奧藏乎廣成之室神授乎安期之手吾  
儕敢私持以為壽封君曰龜則然矣何名為丹其方孰  
傳效孰與宣搵以既我又安用焉客曰其用則鍊日煑  
月納坤藏乾妙奪物性潛移化權其物則姤女嬰兒皓  
虎蒼龍儕分耦合會乎其中其法則滲之以離坎養之  
以屯蒙液華池以為漿閉丸泥以為封羯火為之銷怪

山藥為之斂蹤乃酌園丘之赤泉咀沔塗之樂木主霞  
實以為養七神棲以為服蓋有翼靈氛於兩肘睫倒景  
於雙矚摩銅狄於城門算瑤籌於海屋者矣封君輟然  
而笑曰有是哉惟厥有始賦形受氣五行為經三事為  
利調劑為飲魚炙為飼膏液刀七鍼磨砭焯攻表為防  
輔正為衛有一缺者是謂弗備若夫鶴算龜齡龐翁鮒  
背不窮而達不色而瘁固有幽冥握其機衡沖漠司其  
剖制者也吾將以大塊為鼎元氣為爐陰陽為水火寒



暑為朝晡作息為抽漆之侯弛張為闔闢之符咀仁義  
以為華嘖道德以為腴樂余生以自適聽吾命之所如  
諒茲物之足珍與斯言之匪誣亦聊以資張華之物博  
助鄒衍之談餘豈竒貨之務寶眷高情之是與望賓階  
而再拜韞我匱而藏諸客亦起而拜曰不腆敝物以實  
華宇公既受貺亦復受祜願公省壽永錫純嘏維百千  
禩為丹竈主

懷仙樓賦

宋

葛長庚

巍乎高哉斯樓位置上接層霄下臨無地宜羣仙之所  
居日觴詠以為娛與造物以遊遨有青天兮為徒曉日  
曛曛卷上真珠十二欄干悉如金鋪翠煙藏山下有忽  
無晚風颯至琪林扶疎明月初上天籟虛徐松竹起舞  
自然笙竽樓中仙子於此時也玉鑪金鼎妙香繞衣興  
即舉酒醉即賦詩詩成大笑鬼神獻歎仙子自樂問天  
何時至如霧雨空濛千巖顯晦平田萬頃白水汪濊一  
望冥茫如江之匯星月交光空水澄霽下視女牆花木

蔽翳滿城樓臺飛燿天際及乎夜深清露飄草八表無  
雲煙沈斗墮與彼晝閒玉雲在檐飛鳥啼斷落花廉纖  
仙子呼青童命素娥捧翠盤薦金螺白眼視朱紫未許  
臆塵高眇吟情其不極放草聖以舒豪覽江山以慨想  
望虛無兮高遠嗟光景兮如流覺青春兮婉婉於是敕  
六吏檄五官竄三尸於太淵殛六賊於崑崙嘯命風霆  
歸奉絳君延羲娥於大庭友堪輿於無始烹天得滓鍊  
道取髓蓋將把八空之氣御九極之風呼玉鸞以為轡

使瓊英以為容者也故闢斯樓於焉興懷夫樓之北鬱  
然高岡則任敦於此乎仙樓之南紫氣在望則何氏九  
仙於此乎得道樓之東鹿徑就荒榴洞猶存樓之西怡  
山翠峙壇空井寒彼何人斯有志者事竟成也

鶴林賦

宋 葛長庚

浮虛空以為家兮森萬象於其庭養混沌以為子兮游  
乎象帝之先跨八極以翱翔兮泛神風之浩蕩步大方  
以汗漫兮采琪花之嬋娟轡九龍兮駕素月銜八駿兮

凌紫煙上挽天河於碧落兮下拽夜臺於黃泉吾將鞭  
白鶴而過罽賓兮勒青牛而旅于闐鳴玉融之簫兮歌  
太極鼓雲和之瑟兮舞胎仙登崑崙兮訪軒后之金樞  
樓九疑兮覓舜娥之玉鈿麟洲縹緲兮鳳巢蓬萊清淺  
兮桑田讓五芝之髓兮入昊天而馥馥掬八桂之漿兮  
流華池之涓涓黃元真人兮乘太霞羽鈴之珮紫虛元  
君兮控夜光九丹之絃左扶桑兮右廣寒入天谷兮出  
太淵此心兮秋鵬吾身兮冬蟬草羅鄴下元之牒兮東

精爽於華漠翻鬱羅蕭臺之錄兮邈清邃於虛玄凭玉  
樓兮窈窕唱霓裳兮踰曉月地雲階兮青鳥不來霞都  
煙闕兮紫瓊依然呼惡來兮召玄冥役阿香兮檄鳥媽  
飲九醞以醕酏兮坐斷延康之始劫撫三花以舒嘯兮  
問訊龍漢之初年鍊日月兮煮璇璣聲雷電兮驚萬天  
盜浮丘之背兮拍洪崖之肩喚漆園之夢兮究鹿苑之  
禪曾襟兮全易物我兮純乾吾族兮大庭乃祖兮有顛  
若有所得兮出華陽之派吾從所適兮乘海瓊之船窮

其裔兮來於錢鏗為我友兮其惟倜傥慰曲江之蒲兮  
鞠茂陵之草偷大有之桃兮耕太華之蓮以滄海而為  
硯兮命盤古而使磨字穹窿以為碑兮召儵忽而使鐫  
契屢空兮為藥悟一唯兮杜鵑大道死兮羲皇泣不周  
崩兮女媧鳴哀大禹兮足胝笑神農兮髮鬢宴瑤臺兮  
問王母以索笑瀉金液兮顧閭老之垂涎侵帝座兮嚴  
陵撩女星兮張騫緝榭錦兮蜉蝣之裸何如編蘭帶兮  
蟪蛄之鳴誰憐已矣夫挈太古兮戲蟻國與造物兮下

芝田藻鳧松鶴兮自然之長短桃姬梭鬼兮何有於媿  
妍悲紅塵以思蛻兮蟄須彌於芥子指蒼漢以言歸兮  
放赤子於大千夫是之謂誰乎蓋太清之散吏而紫府  
之剝員彼南荒之鶴林子焉

麻姑賦

宋 葛長庚

片雲老仙枕五峰而眠無人間夢二十年白玉蟾從桂  
林道衡山下大江以西登孱顏而拜之有黃冠師鄧適  
軒會唯齋江道遙小集道遙山慨麻姑之去遠緬王蔡



其猶昔俯稚川濯丹之泉驗福唐遺簡之地丹崖翠壁  
邈接太清碧殿紫壇風清月白樹色黯黹泉聲琮瑤上  
齊雲之峰按垂玉之亭花陰卧白犬松籟雜黃鶯雨滴  
檐牙之溜風搖樓角之鈴有鳴倉庚有伐丁丁霜畦老  
芝朮煙苑多桂苓諗碧蓮之杳漠空四海之疇鄰柳耆  
花面不成笑筍角蕨拳聊自伸池水成文以羅殼海棠  
落瓣如魚鱗啼鶯語燕不可聽矣昔者黃花姑戚姬南  
直從麻姑之魚軒眇天風兮鱗鱗飯雲擘麟玳筵生春

黛娥歌賓雲之曲玉妃舞紫茸之茵但知笑吟終日兮  
不知有蚩蚩之人憶昨夢歎前塵顧安得景從颺舉以  
覓酒於鸞帳之下賦詩於鶴馭之前徃聞驪姥以水飲  
陳圖南又聞紫虛夫人以桂花與陳興明西王母以蟠  
實戲曼倩予媿無德以儷之若夫先鸞後鶴彈壓天鈴  
傲傲以娛仙懷浩浩以控飛翬得不為香案之下吏者  
乎姑有耳寧不聽姑有心寧不矜否則鞭豐隆駕飛廉  
以終其身叫東皇西母於瑤池問南烏北兔於海濱揖

爽以揖浮拍闌以拍洪鏘玉珮兮丁東行太空兮逐冥  
鴻醉忽醒醒忽有所思不能無所賦蓬萊清淺兮將桑  
田矣天地未判之始父母未生之前曰不然又何從而  
有昆明之劫灰

疑仙賦

有序

宋  
李覲

覲家盱江其西十里則麻姑山顏太師真卿有記存焉  
少北則麻源謝靈運詩所謂入華子岡是麻源第三谷  
者也其山水清媚與神仙趾迹相附著在人口吻吾母

初無子凡有可禱無不至祥符元年夢二道士奕棊戶外往觀之其一人者取局之一子授焉遂娠及覲生十餘歲從先父適田間宿東郊既寐有人以書與覲方制如牘表用黃其目曰王狀元文集夢中以為沂公之文也就學以來果不甚魯或時開卷恍然憶念謂曾讀此書再思之未嘗見也墨筆著辭雖未善顧出自然不多勞力私心喜幸以所從受頗靈異而不敢言今茲年三十有八矣乃用自疑作疑仙賦儒者不言仙蓋患乎傷

財舍生以學之者也苟異於彼宜無害賦曰

噫噫仙乎為有為無為天之居為地之廬為山之國為

水之都為古為今為智為愚為崇為卑為肥為臞與人

類乎與人異乎將天下之利乎將一身而已乎既匪聞

而匪見我焉知其所如繫我之生卓犖瓌怪地氣殊絕

神休合會導愚心之趨驟犯古人之畿界攀或無高博

或無大戲釣天之遺音盲慶雲之渥彩意靈物之所佑

幸速成於當代難得而易失者時哉青春走兮素髮催

銜金丹而不售撫道殮而銜哀然則何為而生何為而  
來已矣夫嵩高降神生申甫收拾中興還聖主長庚入  
夢生李白叫噪江南為逐客今之生我豈無意二者他  
年終一得仙人若在金銀宮歸去來兮誰阻隔

詆仙賦

有序

宋  
宋 祁

予既守壽春覽郡圖得八公山故老爭言山上有車轍  
馬跡是淮南王上賓之遺耕者徃徃得金云丹砂所化  
可以療病因取班固書葛洪神仙二傳合而質之嗟乎

人之好奇而不責實也尚矣而洪又非愚無知者猶憑  
浮證偽況鄙人委巷語耶作詆仙賦

憫茲俗之鮮知兮徇悠悠之妄陳常牽竒以合怪兮欲  
矜己以自神操百世之實亡兮唱千齡之偽存彼淮南  
之有將兮固殊刺而殞身緣內篇之丕誕兮眩南宮之  
多聞謂八人者語王兮歷倒景而上賓餌玉七之神藥  
託此謳乎霄宸王負驕以弗虔兮又見謫於列真雖長  
年之彌億兮屏帑偃而念愆念斯事之吾欺兮聊反復

乎遺言號聖仙之靈稟兮宜常監德而輔仁不是察王  
倨貴兮遽引內於天門已乃悟其非是兮胡為賞罰之  
紛紜寧仙者之回惑兮無以異乎常人國為墟而嗣絕  
兮載遺惡而不泯故盛傳其遺金兮證蹄石之餘痕武  
安陰語而前死兮更生偽鑄以贖論彼逞詐以罔時兮  
宜自警於斯文

栖霞賦送道人還山

金  
趙秉文

粵有人兮襲芳華跡城郭兮志煙霞賦言歸兮杳何許



蹇遲迴兮徒延佇貝闕兮珠宮撫膝上兮絲桐高情兮  
天外歸鴻靈宮兮玉紀玄都兮寶藏祝君王兮萬壽侍  
玉宸兮天上辱莫辱於多憂樂莫樂兮無求望白雲兮  
歸休三年胡為兮此淹留朝游兮山南暮游兮山北徙  
倚兮亭上聊逍遙以終日日坐兮清暉臨深兮翠微西  
山扶兮曉釀秋水樂兮朝饑山近兮多雨雲昏昏兮承  
宇煙消兮霧散見恒茂兮遠樹樹斷兮天開鴈翩翩兮  
南渡忽人歸兮鳥盡但空山兮日暮日暮兮浮雲滋目

極千里兮傷心悲  
山中人兮歸來白首不歸兮何時亂  
曰山中人兮煙霞宅  
翠羽簾白玉額有友麋鹿兮侶猿  
鶴飲清泉兮坐白石  
山中人煙霞衣青天成幄白露成  
帷風為襟兮月為佩  
娛清暉兮愴忘歸  
山中人兮煙霞  
語黑霓落手兮醉毫舞蓬萊  
山兮在何處乘清風兮欲  
歸去

崆峒雪樵賦

明  
宋濂

伊崆峒之拔起兮鎮嶠南之靈區  
翠旂纒其湯壘兮播

顛氣之蕤綏章貢挾以北流兮盡土脈之滋腴穴遙通  
於龍翁兮勢蟠亘於鬱孤信地維之奧宅兮為靈真之  
所都則有白鵝羽人黃堂丹士闕玉為房鑄金成黍仰  
青帝之布帷撥赤霞而啓筭悼下土之空濁凌剛風以  
逕度惟彭城之仙子兮式爛柯之遺軌謂靈奕之可觀  
兮意翩翩而遐舉裘翦鹿肌之花履約芝田之蕊巾割  
湘雲之枝輦點彩鷁之尾傷胡麻之未飯愛白石之堪  
煮踰洞真之石扉借修月之寶斧期緜筮之下臨兮庶

綠文之可授於時  
玄冬居朔氣交水腹  
堅金莖高二鶴  
夜語獨鳥晝韜莽  
六花之聚白合溟  
滓於空寥幻九清  
之祕景闢太素之  
神苞奪人目精兮  
若流汞翻空而不  
定一白無地兮如  
爛銀炫耀於霜皐  
瓊林玉樹疊穎照  
條柯頓亡於春綠  
藹巧綴於晴梢乃  
陟瑤磴乃依冰樾  
膚中寒而生鱗指  
屢僵而弗屈丁丁  
許許不遺餘力已  
枯成采方長不折  
玉屑隨聲而輕墮  
霜莖倚雲而初積  
束以九真之赤藤  
附以千年之苓魄  
既逍遙而詠歸忘

蕉鹿於今昔歌曰我采我樵兮太濛之野萬樹玲瓏兮  
玉光照夜孰能相從兮與電旌而俱下於是築石竈繙  
金經養神火鍊黃寧汞生水虎之窟鉛出火龍之局液  
承太一之珠機運元華之精憑漆坤之卦券植鄴鄂之  
丹城逮伐毛而洗髓致陰燦而陽凝種芝於瓊玉之山  
折桂於廣寒之庭領衿佩於橋門集鷓鴣於王廷白簡  
霜飛繡衣春明近一出而持斧使九夏之生冰定乘風  
而來歸兮於瀛洲之先登隔人間之風雨兮遽真凡之

異程至若西鄰之子沈酣羶葷屏龜香曙笙火花春葆  
階舞楚銀館歌秦黃塵迷南華之夢敝屣嗤東郭之貧  
樂鐘鼎之遺豔厭煙霞之近醇尚父釣渭阿衡耕莘或  
封齊於東海或致君於華勳齊出處於一途肯變志於  
屈伸世續紛兮麗以新蠟代薪兮傷芳辰翻海水以為  
霖兮曾莫濯夫游塵孰不化為胡燕兮依華棖之飛文  
丹琴鳴夫空谷兮亦寥寥之一聞彈樵歌之逸響兮寄  
綠綺於秋旻歌曰若有人兮在蘭屋止白虎為使陟宗

熾止皓義迴颺敷天葩止虛白內朗絕纖瑕止仁弁義  
折龍鏘鳴止鵜膏匪施加弗形止翦彼薪樗扶松栢止  
養賢大鼎熟以烹止天下為公大道行止溯風屹立思  
盈盈止

澹漠賦

明張宇初

粵太初之冲漠兮紛萬彙之資生爰混沌之始鑿兮列  
儀象以為經根動靜而始畫兮迭奇耦以五行曰圖書  
之是則兮立三極以權衡時俯仰於浩渺兮互消長乎

生成維二五之妙合宛歷環樞而內凝網緼以塊北兮  
煌燿而惚恍漠虛靜而恬逸兮求玄珠於象罔湛一黍  
之空懸兮儼雲蒸而霓朗抱規中以潛淵兮廓浮游以  
潤養旋乾坤之復姤兮協降升以轅輞濯暘谷而適皇  
兮乘扶搖以沆漭策萑旃而睠蕙纒兮謁靈君於輝晃  
嚙玉液與桂漿兮翳緜纒之鬱泱乃授予曰惟混茫兮  
超澹漠乎寥闐是庸滌此渙漑兮返玄精於蘊質駕黔  
羸之曖暎兮御六氣之豐蔚貫離明以實坎晦兮乃弭



節而運一息何周始之無端兮曰涓滂而有淪期羨得  
而遐舉兮由乃味乎醇真松喬矯而壽考兮奚椿栢之  
與鄰彼豈信儉生兮潛崖谷之躋辛志冰霜之高節兮  
眇幻有若漏塵豈紛華之謂美兮溺麤穢何由論慨予  
生之蹇鈍兮徒留志乎昔芬漫先訓之紛糾兮悒余中  
之莫伸怡徜徉樂大化兮頰蘅槁之隱淪棄詆謾而釋  
策兮叩厖鴻乎問津絕柔濮之蚤鳴兮大音浩乎若聞  
胡康匏之見寶兮又何顧乎商敦慨衲鑿之齟齬兮若

胡質於猶薰向可眷燿媚兮每希榮而歎悴孰不固予  
異操兮仰老列之猶貴伊揚雄之守玄兮且美根而密  
之矧屈子之遠遊兮亦中存其灑氣濬沈濁以虛待兮  
聊漱鑿而猶豫遠姱嫫觀隅隈兮宜殉潔以蟬蛻惟賈  
誼之哀鵬兮了死生以奚慮孰若遇厥冷風兮造列缺  
之何繫外爾躬之附贅兮豈為物之蝨蝟薄晨星之寥  
落兮徒餘光之衍洩悲埃壘之阨陋兮獨惶惶而惛惛  
紉蘭佩而欲遺兮搴薜蘿以蹇釋睇芳躅之欲追兮邈

高蹇而乍峪餐露華於菊英兮感質難而形踏齊物我  
於稊米兮曠窮達而奚恤仰威鳳之高翔兮曷德輝之  
惜媿懼跋鼈之跬躡兮騎轆轤而靡軾將求之以叩丹  
丘兮詎知無言之玄默

隱真賦

明  
蔣德璟

削慧館真雪貌風紋衫含蕉氣履啣松根饑煮石桃髓  
香味勻金母不知以兒偷聞桃解人言此客仙半箕濮  
狂冥羨安汗漫跨雲倒迴罩星暗換或譏螯熊亦諂癯

鶴夷然當之似謗還讚遂乃荔柯結幔蓮花洗杯空青  
林結瑪瑙雲開劈日組月吸電掬雷方瞳一角暫別還  
來糝丹為飯伏氣成胎常哂方朔偷非仙才若夫食螺  
就空便了亦去四無人聲惟石與樹嶺似鷺領洲如鷄  
鵠亦復言僊不如箕踞念古高民有名無事精以寶身  
緒為衆茹寧能上天子軀生翅新僊位卑骨傲難侍石  
桃點頭余亦徑醉

廣寒宮賦

有序

明汪仲魯

按唐逸史異聞錄所載明皇遊廣寒宮事語多不同然

皆怪誕不經之辭也惟廣寒宮之所以得名則有可推

者蓋日陽精也主乎離月陰精也位乎坎日月運行而

寒暑生焉則是月也者以其配坎生寒而得名也歟世

言嫦娥居之者豈亦以陰柔為陽剛之配故有是說猶

乾父坤母之義也歟故託為素娥之辭作廣寒宮賦

夫何素娥之嬋娟兮爰託身於廣寒質團團而外融兮

心熒熒而內安念茲宮獨弘敞兮匪刻楠與丹楹瓦青

雲而上覆兮棟蜺虹而中橫靈星外峙兮泰階前平井  
木東植兮兌金鏤蔓爛壁奎以交映兮垣墉周乎列星  
豈工師之巧思兮惟太一之玄精虛豁洞達兮晃朗穹  
窿照耀無方兮高明有容規天以為度兮環海以為疆  
炯素肌之熒熒兮播下土而流光羌獨處此中宮兮感  
四時之代序含柔姿而蘊靈德兮朝晦藏而宵睹朏朏  
警而朏魄充兮識盈虛之有數驚爽籟之潛發兮向清  
颺以延佇露方灑灑呈白兮霜又淒其盈宇盼圓靈既

雪凝兮顧柔祗復冰積甚冷光以無眠兮含翠輝而欲  
滴何默默而靡言兮悼羣類之生生粵陽明之和煦兮  
匪陰靜其焉成志專專而靡他兮物已遂而居貞豈官  
居而孤歎兮不貌飾而情更愷長位茲北坎兮配離麗  
之明明彼兔蟾與桂樹兮固無取乎此也杵玉白之玄  
霜兮孰謂長生而不死也弄妃竊藥上迷兮既怪謬而  
匪經唐皇託以夜遊兮誕惟欺夫童冥儻極一理於天  
人兮信吾廣寒之有徵辭曰日月運行寒暑生兮一寒

一暑歲功成兮配日惟月秉陰靈兮厥靈伊何匹妃惟  
貞兮父乾母坤柔順以承兮位坎處中厥宮實名兮內  
守不渝蘊玄之精兮洞濟六合德耀斯宏兮嚴凜姿容  
夜煜秋凝兮猗歟廣寒懸象著明兮

鹿苑賦

魏

高允

啓重基於朔土系軒轅之洪裔武承天以作主熙大明  
以御世灑靈液以滂沱扇仁風以遐被踵姬文而築苑  
包山澤以開制植羣物以充務蠲四民之常稅暨我皇



之繼統誕天縱之明獻追鹿野之在昔興三轉之高義  
振幽宗於已永曠千載而可寄於是命匠選工刊茲西  
嶺注誠端思仰模神影庶真容之髣髴燿金暉之煥炳  
即靈崖以構宇竦百尋而直正絙飛梁於浮柱列荷華  
於綺井圖之以萬形綴之以清永若祇洹之瞪對孰道  
場之塗迴嗟神功之所建超終古而秀出實靈祇之協  
贊故存貞而保吉鑿仙窟以居禪闢重階以通術澄清  
氣於高軒佇流芳於王室茂花樹以芬敷涌醴泉之洋

溢祈龍宮以降雨侷膏液於星畢若乃研道之倫行業  
貞簡慕德懷風杖策來踐守應貞之重禁味三藏之淵  
典或步林以經行或寂坐而端宴會衆善以並臻排五  
難而俱遣道欲隱而彌彰名欲晦而逾顯伊皇輿之所  
幸每垂心於華囿樂在茲之閒敞作離宮以營築固爽  
塏以崇居枕平原之高陸恬仁智之所懷眷山水以肆  
目玩藻林以遊思絕鷹犬之馳逐眷耆年以廣德縱生  
生以延福慧愛內隆金聲外發功濟普天善不自伐尚

諮賢以問道詢芻蕘以補闕盡敬恭於靈寺遵晦聖而  
致謁奉請戒以畢日兼六時而宵月何精誠之至到良  
九劫之可越資聖王之遠圖豈循常以明教希縉雲之  
上升羨頂生之高蹈思離塵以邁俗涉玄門之幽奧禪  
諸宮以正位受太上之尊號既存無而御有亦執靜以  
鎮躁觀天規於今日尋仙哲之遺誥悟二乾之重陰審  
明離之並照下寧濟於兆民上克光於七廟一萬國以  
從風總羣生而為導正南面以無為永措心於沖妙夫

道化之難期幸微躬之遭遇逢扶桑之初開  
溝長夜之始曙顧衰年以懷傷惟負忝以危懼  
敢布心以陳誠效鄙言以自著

淨業賦

有序

梁武帝

少愛山水有懷丘壑身羈俗羅不獲遂志舛獨往之行  
乖任縱之心因爾登庸以從王事屬時多故世路屯蹇  
有事戎旅略無寧歲上政昏虐下豎姦亂君子道消小  
人道長御刀應敕梅蟲兒茹法珍俞靈韻豐勇之如是

等多輩誌公所謂亂戴頭者也誌公者是沙門寶誌形  
服不定示見無方於時羣小疑其神異乃羈之華林外  
閣公亦怒而言曰亂戴頭亂戴頭各執權軸人出號令  
威福自由生殺在口忠良被屠馘之害功臣受無辜之  
誅服色齊同分頭各驅皆稱帝主人主尊極用其詭詐  
疑亂衆心出入盤遊無忘昏曉屏除京邑不脫日夜屬  
纊者絕氣道傍子不遑哭臨月者行產路側母不及抱  
百姓凜凜如崩厥角長沙宣武王有大功於國禮報無

報酷害奄及至於弟姪亦罹其禍遂復遣桓神與杜伯符等六七輕使以至雍州就諸軍帥欲見謀害衆心不與故事無成後遣劉山陽灼然見取壯士驅虎器甲精銳君親無校便欲束身待戮此之橫暴出自羣小畏壓溺三不弔况復姦豎乎若默然就死為天下笑俄而山陽至荊州為蕭穎胄所執即遣馬驛傳道至雍州乃赫然大號建牙豎旗四方同心如響應聲以齊永元二年正月發自襄陽義勇如雲舳艫翳漢竟陵太守曹宗馬

軍主殷昌等各領騎步夾岸迎候波浪逆流亦四十里  
至朕所乘舫乃止有雙白魚跳入榻前義等孟津事符  
冥應雲動天行雷震風馳郢城克定江州降款姑熟甲  
冑望風退散新亭李居士稽首歸降獨夫既除蒼生甦  
息便欲歸志園林任情草澤下逼民心上畏天命事不  
獲已遂膺大寶如臨深淵如履薄冰猶欲避位以俟能  
者若其遜讓必復魚潰非直身死名辱亦負累幽顯乃  
作賦曰日夜常思惟循環亦已窮終之或得離離之必

不終負宸臨朝冕旒四海味旦乾乾夕惕若厲朽索御  
六馬方此非譬世論者以朕方之湯武然朕不得以比  
湯武湯武亦不得以比朕湯武是聖人朕是凡人此不  
得以比湯武但湯武君臣義未絕而有南巢白旗之事  
朕君臣義已絕然後埽定獨夫為天下除患以是二塗  
故不得相比朕布衣之時唯知禮義不知信向烹宰衆  
生以接賓客隨物肉食不識菜味及至南面富有天下  
遠方珍羞貢獻相繼海內異食莫不畢至方丈蒲前百



味盈俎乃方食輟箸對案流泣恨不得以及溫清朝夕  
供養何心獨甘此膳因爾蔬食不噉魚肉雖自內行不  
使外知至於禮宴羣臣饋膳按常菜食味習體過黃羸  
朝中班班始有知者謝朐孔彥穎等屢勸解素乃是忠  
至未達朕心朕又自念有天下本非宿志杜恕有云刻  
心擲地數片肉耳所賴明達君子亮其本心誰知我不  
貪天下唯當行人所不能行者今天下有以知我心復  
斷房室不與嬪侍同屋而處四十餘年矣於時四體小

惡問上省師劉澄之姚菩提疾候所以劉澄之云澄之  
知是飲食過所致答劉澄之云我是布衣甘肥恣口劉  
澄之云官昔日食那得及今日食姚菩提含笑搖頭云  
唯菩提知官房室過多所以致爾於時久不食魚肉亦  
斷房室以其智非和緩術無扁華默然不言不復詰問  
猶令為治劉澄之處酒姚菩提處丸服之病逾增甚以  
其無所知故不復服因爾有疾常自為方不服醫藥亦  
四十餘年矣本非精進既不食衆生無復殺害障既不

御內無復欲惡障除此二障意識稍明內外經書讀便  
解悟從是已來始知歸向禮云人生而靜天之性也感  
物而動性之欲也有動則心垢有靜則心淨外動既止  
內心亦明始自覺悟患累無所由生也乃作淨業賦云  
爾

觀人生之天性抱妙氣而清靜感外物以動欲心攀緣  
而成昔過恒發於外塵累必由於前境若空谷之應聲  
似遊形之有影懷貪心而不厭縱內意而自騁目隨色

而變易眼逐貌而轉移觀五色之玄黃翫七寶之陸離  
著華麗之窈窕耽冶容之逶迤在寢興而不捨亦日夜  
而忘疲如英媒之在摘若駿馬之帶羈類白日之麗天  
乃歷年之不虧觀耳識之愛聲亦如飛鳥之歸林既流  
連於絲竹亦繁會於五音經昏明而不絕歷四時而相  
尋或亂情而惑慮或怡耳而堙心至如香氣醇起觸鼻  
發識婉婉追隨氤氳無極蘭麝夾飛如鳥二翼若渴飲  
毒如寒披棘舌之嗜味衆塵無有大苦鹹酸莫不甘口

噉食衆生虐及飛走唯日不足長夜飲酒悖亂明行罔  
慮幽咎身之受觸以自安怡美目清揚巧笑蛾眉細腰  
纖手弱骨豐肌附身芳潔觸體如脂狂心迷惑倒想自  
欺至如意識攀緣亂念無邊靡懷善想皆起惡詮如是  
六塵同障善道方緊奪朱如風靡草抱惑而生與之偕  
老隨逐無明莫非煩惱輪迴火宅沈溺苦海長夜執固  
終不能改迤否相隨災異互起內懷邪信外縱淫祀排  
虛枉命蹶實橫死妄生神祐以招福祉前輪折軸後車

覆軌殃國禍家亡身絕祀初不內訟責躬反已皇天無  
親唯與善人外清眼境內淨心塵不與不取不愛不嗔  
如玉有潤如竹有筠如芙蓉之在池若芳蘭之生春淤  
泥不能汙其體重昏不能覆其真霧露集而珠流光風  
動而生芬為善多而歲積明行動而日新常與德而相  
隨恒與道而為鄰見淨業之愛果以不殺而為因離欲  
惡而自修故無障於精神患累已除障礙亦淨如久澄  
水如新磨鏡外照多像內見衆病既除客塵又還自性

三途長乖八難永滅止善既修行善無缺清淨一道無  
有異轍唯有哲人乃能披襟如石投水莫逆於心心清  
冷其若冰志皎潔其如雪在欲結其既除懷憂畏其亦  
滅與恩愛而長違顧生死而永別覽當今之逸少想後  
來之英童懷荆玉而未剖藏神器而存躬修聖行其不  
已信善積而無窮永劫揚其美名萬代流於清風豈伏  
強而稱勇乃道勝而為雄

玄圃園講賦

梁  
蕭子雲

曰天監之十七屬儲德之方宣惟玉帛之光盛信昌符  
之在焉於是上照天下漏泉輪囷之氣吐煙日月之景  
揚圓乃聖武之龍飛載為家於天下思承規於景數遂  
長發而明社若重光於有周似二英於皇夏方前星而  
列曜播洪鐘於肩雅去茲永福來即東朝文物是紀聲  
名是昭發玄章於粉績靡青綏於翠翹鑿納那而垂藻  
笳和鳴以承簫載錫其光令聞令望察情幄帳讓齒虞  
庠性與天道言為珪璋詩史遙集禮易翱翔義華洛水



文麗清漳昔七覺之吐華高人天而為長道西被乎日  
用法東流而未朗故授神荊於文昌寄寶船於明兩異  
昔談而同世亦千年而影響聞填填之法雷見慧雲之  
初爽真如之軌既接發揮之功已躡開金泥剖玉牒削  
蒸栗之簡採羅樹之葉石室靈篇南宮神籙所以一音  
不已而待規重矩疊者矣惟至人之講道必山林之間  
曠彼柰園與杏壇深淨名與素王模清遊之浩養擬樂  
賢之隆壯睿情杳然是焉供帳乃高談玄圃之苑張樂

宣猷之上觀夫靈圃要妙總禁林之宥窳稟輦道之三  
星躔離宮之六曜寫溟浚沿方華作峭其山則刻施猊  
牙礪磴譎詭坂墀截薛夏含霜雪下則谿壑泓澄虹蟠  
降升上則青霄丹氣雲霞鬱蒸金華琳碧燭銀硯石藻  
玉擣白丹瑕流赤周以玉樹灌叢紫桂香楓貫當含仁  
桃枝育蟲妙草的皪靈果垂葭長卿寒翠簡子秋紅崖  
戴雲而吐雨木鳴條而起風中有蘭渚華池淥流濕澤  
激水推移彌望杳溟倒飛閣之嵯峨漾釣臺而浮迴張

翠帷於鴻船泛羽旒於雀艇鳥則杉雞繡質木容錦章  
戴勝吐綬鷓鴣鷗香壁龜紫鼈鵬鵠鴛鴦風鳴日思高  
廣浮長內則錢行菱華菡萏散葩砒砢巨石潰漉碧沙  
離筵比目累綺紅蝦漂青綸之衰折蕩碧組之鬚髮銅  
龜受水而獨涌石鯨吐浪而戴華所以藉園籞之壯觀  
將髣像於毗耶於是清宮廣闊宿設宵張華燈熠燿火  
樹散芒斂閃六尺龍叢九光穎若流金之出沙嶼繁若  
列宿之動天潢朝曠朗而戒旦雲依靠而卷簇輕輦西

園齊宮北圃文衛濟濟僧徒肅肅法鼓朗而震音衆香  
秘而流馥亦有百獸眈眈穆穆雲車九層芝駕四鹿吳  
姬楚豔胡笳燕筑常從名倡戲馬蹋鞠巡少陽渡紫複  
繞宗賢瞰承祿揚散華之飄颻響清梵於林木燈王歸  
而贈筵香積來而獻熟似衆聖之乘空若能仁之在目  
既而俄軒有睟肆筵授几高殿肅而神嚴微言欣而奏  
理煥嘉語於丹青得親承於音旨智周物而為心情研  
幾而盡諦言超超而出象理亶亶而踰繫魏兩娛心之

談未足云晉儲真假之理豈能速史臣乃載筆撰功請  
事其職賦金相模玉式世既聞甘露之言民已登仁壽  
之域矣將奉瑤宮之軌陪雲樓之軌福穰穰委如山長  
莫長永無極

脩心賦

有序

陳江總

太清四年秋七月避地於會稽龍華寺此伽藍者余六  
世祖宋尚書右僕射州陵侯元嘉二十四年之所構也  
侯之王父晉護軍將軍彪昔茲此邦卜居山陰都陽里

詒厥子孫有終焉之志寺域則宅之舊基左江右湖面  
山背壑東西陵跨南北紆縈聊與苦節名僧同消日月  
曉脩經戒夕覽圖書寢處風雲憑樓水月不意華戎莫  
辨朝市傾淪以此傷情固可知矣啜泣濡翰豈擬鬱結  
庶後生君子憫余此槩焉

嘉南斗之分次肇東越之靈祕表檜風於韓什著鎮山  
於周紀蘊大禹之金書鐫暴秦之石字太史來而探穴  
鍾離去而開筭信竹箭之為珍何砥砢之罕值奉盛德

之鴻祀寓安禪之古寺實豫章之舊圃成黃金之勝地  
遂寂默之幽心若鏡心之遠尋面曾阜之超忽適平湖  
之迴深山條偃寒水葉浸淫挂猿朝落饑龜夜吟畧叢  
藥苑桃蹊橘林梢雲拂日結暗生陰保自然之雅趣鄙  
人間之荒雜望島嶼之遭迴面江源之重沓泛流月之  
夜迴曳光煙之曉匝風引蜩而嘶噪雨鳴林而脩壑鳥  
稍狎而知來雲無情而自合邇乃野開靈塔地築禪居  
喜園迢遞樂樹扶疎經行藉草宴坐臨渠持戒振錫庇

影甘蔬堅固之林可喻寂滅之場暫如異曲終而悲起  
非木落而愁如豈降志而辱身不露才而揚已鍾風雨  
之掩靄倦雞鳴之聒耳幸避地而高樓憑調御之遺旨  
折四辯之微言悟三乘之妙理遣十纏之繫縛祛五惑  
之塵滓久遺榮於勢利庶忘累於妻子感意氣於疇日  
寄知音於來祀何遠客之可悲私自憐其何已

孟蘭盆賦

唐楊炯

粵大周如意二年秋七月聖神皇帝御洛城南門會十



方賢衆蓋天子之孝也。渾元告秋義和奏曉太陰望兮。  
圓鏡皎闔闔開兮。涼風嫋四海澄兮。百川晶陰陽肅兮。  
天地杳埽離宮清重閣。設皇邸張翠幕。鸞飛鳳翔。暎暘  
倏燦雲舒霞布。翕赫忽霍陳法供飾。孟蘭壯神功之妙  
物何造化之多端。青蓮吐而非夏。蘋果搖而不寒。銅鐵  
銀錫瓊琳琅玕映以甘泉之玉樹冠以承露之金盤。憲  
章三極儀形萬類上寥廓兮。法天下安貞兮。像地殫怪  
力窮神異少君王子掣曳兮。若來玉女瑤姬翩躑躅兮。

兮必至鳴鷓鴣與鴛鴦舞鸚鵡與翡翠毒龍拏兮赫然  
狂象奔兮沈醉怖魍魎潛魑魅離婁明目不足見其精  
微匠石洗心不足徵其奧祕續續紛紛氛氛氲氲五色  
成文若榮光休氣發彩於重雲萋萋粲粲煥煥爛爛三  
光啓旦若合璧連珠耿耀於長漢夫其遠也天台傑起  
繞之以赤霞夫其近也削成孤峙覆之以蓮花晃兮瑤  
臺之帝室絕兮金闕之仙家其高也出諸天於大梵其  
廣也遍諸法於恒沙上可以薦元符於七廟下可以納

羣動於三車者也於是乎騰聲明列部伍前朱雀後玄  
武左蒼龍右白虎環衛匝羽林周雷鼓八面龍旗九旂  
星戈耀日霜戟含秋三公以位百寮乃入鳴珮鏘鏘高  
冠岌岌規矩中威容翕無族談無錯立若乃山中禪定  
樹下經行菩薩之權現如來之化身莫不汪洋在列歡  
喜充庭天人儼而同會龍象寂而無聲聖神皇帝乃冠  
通天佩玉璽冕旒垂目絰纊塞耳前後正臣左右直史  
身為法度聲為宮徵穆穆然南面而觀矣人伎初會四

影高懸上妙之座取於燈王之國大悲之飯出於香積  
之天隨藍寶味舍衛金錢麩為山兮酪為沼花作雨兮  
香作煙明因不測大福無邊鏗九韶撞六律歌千人舞  
八佾孤竹之管雲和之瑟麒麟在郊鳳凰蔽日天神下  
降地祇咸出於是乎上公列卿大夫學士再拜稽首而  
言曰聖人之德無以加於孝乎散元氣運洪鑪斷鼈足  
受龍圖定天寶建皇都至於立宗廟平圭臬繡栒文楮  
山案藻祝昭穆叙樽罍設以覲嚴祖之耿光以揚先皇

之大烈孝之始也考辰耀制明堂廣四修一上圓下方  
布時令合蒸嘗配天而祝文考配帝而祝高皇孝之中  
也宣大乘昭羣聖光祖考登靈慶發深心展誠敬形於  
四海加於百姓孝之終也夫孝始於顯親中於禮神終  
於法輪武盡美矣周命維新聖神皇帝於是乎唯寂唯  
靜無營無欲壽命如天德音如玉任賢相惇風俗遠佞  
人措刑獄省遊讎披圖錄損珠璣寶菽粟罷官之無事  
恤人之不足鼓天地之化淳作皇王之軌躅太陽夕乘

輿歸下端闡入紫微

興唐寺聖容瑞光賦

以天地澄霽高相輝燭為韻

唐

李子卿

中國之至聖兮西方之大仙凝旒為出代之日立極是  
分身之年不然者何以垂其拱而鏡清四海建其像而  
燭耀三天故知有相無相而雙合前聖後聖而兩全不  
儀形乎何以表三身之義不鎔範乎何以塞萬人之意  
乃命鳧氏立法冬官歲事寫真於會王之庭鼓鑄於布

金之地炎帝司火飛廉扇吹九天下觀百神苟伺聲激射氣憑凌殷爾而風雷怒翼然而雲霧蒸波旬下回祿昇爍寶刹炘金繩忽星透而泉噴遂煙消而氣澄圓相鏡開謂太陽新吐真質山立乃胚渾初凝怡然花臺耀此金髻眸容若動慈眼如睇清淨而青蓮始春圓明而白月新霽光然照夜瑞有應於周王像乃見時夢豈漸於漢帝既營珠額仍輝玉毫見之者宜知極樂之近仰之者誰識須彌之高心遂得於真正身豈有於塵勞乘

流者於焉捨筏滯縛者於此操刀夫其發靈光凝瑞相  
異色傍射晴暉遠暢陽烏自耀於暘谷之中燭龍滅燄  
於鐘山之上自有頂而成覩歷恒山而遠望赤光照室  
而多慙紫氣度關而應讓於是百辟奔走萬姓知歸拂  
塵而香雲自遍著人而花雨如飛莫不請施瓔珞願解  
寶衣期誓心於相好聿求福於光輝由是我皇之作也  
與聖同軌與道合躅降其象使天下有所觀播其光使  
天下有所燭不言而人化不欲而人足泛兮墊溺之濟



巨川煥乎重昏之照初旭至矣哉法王之教將萬代而嗣續

招隱寺賦

唐劉乾

其始穿竹田以行崎嶇詰曲十餘里而後至草木幽異  
揉猿下來空谷無人水流花開寺門東向趾古構新茅  
茨接於碧瓦畫牆見乎苔侵青山澹乎吾慮潭影空乎  
人心噫予何來之晚也寺之東南山氣森肅泉名虎跑  
石泓萬斛色若瀆藍聲如夏玉下注三坎雷奔雪觸懸

崖赴壑而不危附川到海而氣足嗚呼竒哉古人之文  
流出肝肺混混而不竭者甚有似於斯而今也不在於  
僕舊聞有昭明太子此曾養晦讀書於此安得起九原

而與之言哉忽然天風吹衣林木清嘯仙邪鬼邪萬竅  
叫邪客有五人者攜壺促予披雲上征求所謂讀書臺  
而弔之立孤峰以展眺探古洞而搜異拂蘚文之午封  
悵石章之滅既雲冉冉以閒飛松颺颺而晴吹驚怪木  
之如龍悅鳥語之禪味悟我生之無始卑佛書之揭諦

假使昭明之猶在將謂此語之不易彼既與未死而俱  
往吾故乘元化而再至臺之上兮多月明臺之下兮古  
道不可行茅山青兮練湖平美人不復兮我心如縈遂  
與客躡雲根緣鳥道踞磐石而坐焉煙霞極目其平如  
席殘陽一片萬屋露脊參蒼間楮如畫如織閱大塊之  
文章歎斯游之竒跡已而悲風淒其四起暝色合乎寒  
城客待予而俱返別遣謝予山靈

江心壩燈賦

明

王光蘊

繫甌江之帶郭湛萬頃之汪洋錯千峰而獻秀激灝景  
於扶桑中浮孤嶼勝甲大荒珠宮敞於溟澥金碧約於  
林塘雙峰峙而應宿浮圖並以摩蒼刻楠朱輪妙奪蓬  
山之觀丹梯翠磴朗移弱水之光時夫殘霞收彩繁星  
初芒煙霏暖於四岸風露淒於孤岡江妃掩霧於清瑟  
估客載月於輕航渺滄波之無際黯夜色之微茫乃瞻  
雙埵然以法燈曦輝晃夫靈曜閃爍燦乎玉繩切雲根  
而掣電埽穹宇而破冥其干霄而上也燐煌縹緲若燭

龍之麗天而光生於葇屋其倒影而流也波搖震蕩若  
金蓮之出水而豔簇於芳汀浪駭蛟螭之避林迴鳥鵲  
之驚氣吐白虹之燄淡含神火之晶燭大千而洞毫髮  
衛龍象而蕩氛腥涌舍利於支那之國燈珠瓔於不夜  
之城神五色於夢幻嘘七寶而騫騰恍然藜於太一奪  
摩尼於金庭彼衆生之墮落嗟苦海之沈淪紛煩惱為  
波浪將夢覺而靡醒惟菩提之見證開覺路於光明一  
燈一佛無滅無生萬燈萬佛無量無垠瑠璃為地日月

為旌祛羣蒙之業障昇炬火於迷瞪化外內於明徹奠  
萬類於清寧若乃光照忠賢之膽輝生詞客之鋒幻致  
文殊之現燄迷王謝之蹤靈光亘於千古流轉託於無  
窮山川炳其精采元化混於濛沖暎茲燈之傳度盍上  
乘之攸宗剖慧珠於淨土開明鏡於頑空挹回光而索  
照曠萬象於虛中借玉毫而燭世期了悟夫玄同重曰  
江之嶼兮卷阿嶼之流兮迴波表中流兮浮圖冠人天  
兮嵯峨參寶炬兮森羅散天花兮瓊波照迷方兮消羣

魔集金仙兮瞻彌陀桑田海水兮若何法輪旋耀兮萬劫不磨

御定歷代賦彙卷一百六

謹案卷一百五第三頁前一行及秋水至按陶隱  
居集水下有方字


第十五頁後八行亘古不改按白香山集作其中  
有象此從文苑英華

第二十四頁前五行而弊也按文苑英華注而一  
作其

第二十四頁後四行如琴絲之相繆按文苑英華  
注繆一作繆



卷一百六第四頁後五行燒丹竈賦按賦中盡祝  
嘏之詞本集注有壽封庶子徐方八十八字



總校官庶吉士臣張能照  
校對官庶吉士臣章宗瀛  
騰錄監生臣沈珺

欽定四庫全書薈要

集部

御定歷代職彙卷二百

七八

詳校官候補通政司經歷臣郭祚熾

御定歷代賦彙卷一百七

覽古

登臺賦 有序

晉陸雲

雜

中叅太府之佐於鄴都以時事巡行鄴宮三臺登

高有感因以言宗替乃作賦云

承后皇之嘉惠兮翼聖宰之威靈肅言詞而述業兮乃  
啟行乎北京巡華室以周流兮登崇臺而上征攀凌砥

而遂濟兮迄雲閣而少寧爾乃佇盼瑤軒流目綺寮中  
原方華綠葉振翹嘉生民之疊疊兮望天啓之蒼蒼歷  
玉階而容與兮步蘭堂以逍遙蒙紫庭之芳塵兮駭洞  
房之迴飈頽響逝而逐物兮傾冠舉而凌霄曲房榮而  
窈眇兮長廊邈而蕭條於是迴路透夷邃宇玄芒深堂  
百室層臺千房闕南牕而蒙暑兮啟朔牖而履霜遊陽  
堂而冬溫兮步陰房而夏涼萬禽委蛇於潛室兮鷲鳳  
矯翼而來翔紛譎詭於有象兮邈悠忽而無方於時南

正司火朱明鬱遂縣車式徐曜靈西墜暑乘陰而增炎  
兮景望淵而曖昧玩瓊宇而情厭兮覽八方而思銳陋  
雨館之常規兮鄙鳴鶻之蔽芾仰凌眇於天庭兮俛旁  
觀乎萬類北溟浩以揚波兮青林煥其興蔚扶桑細於  
毫末兮崑崙卑乎覆篲於是忽焉俯仰天地既翕宇宙  
同區萬物為一原千變之常鈞兮齊億載於今日彼區  
中之側陋兮非吾黨之一室本連觀於無形兮今何求  
而有質於是聊樂近遊薄言徜徉朝登金虎夕步文昌

綺疏列於東序朱戶立乎西廂經蕤擘以披藻兮椒塗  
馥而遺芳感舊物之咸存兮悲昔人之云亡馮虛檻而  
遠想兮審歷命於斯堂於是精疲遊倦白日藏輝鄙春  
登之有情兮惡荆臺之忘歸聊弭節而駕言兮悵將逝  
而徘徊感崇替之靡常兮悟廢興而永懷隆期啟而雲  
升逝運靡其如頽長發惟祥天鑒在晉肅有命而龍飛  
兮跼重斯而肇建嘉有魏之欽若兮鑒靈符而告禪清  
文昌之離宮兮虛紫微而為獻委普天之光宅兮質率

土之黎彥欽哉皇之承天兮集北顧於乃春誕洪祚之  
遠期兮則斯年於有萬

韓王臺賦

有序

晉孫楚

酸棗寺門外夾道左右有兩故臺訪諸故老云韓王聽  
訟觀也

望韓王之故臺尋往代之所營雙闕碣以峻峙貫雲氣  
而上征歷千載而特立顯妙觀於太清薄邯鄲之叢臺  
陋楚國之章華邈峇堯以亢極豈岑樓之能加至乃宮



觀弘敞層臺隱天伐文梓於萬仞發玉石於三泉優倡  
角鳥鳥之聲蛾者戲白雲之舞紛淫衍以低仰翳脩袖  
而容與

登姑蘇臺賦

唐  
任公叔

司馬遷世掌天官才稱良史探禹穴之遺跡紀吳國之  
覆軌乃憮然而嘻曰登此姑蘇之墟淹留兮躊躇感斯  
宇之基為沼而仲雍之祀忽諸我聞周道既衰諸侯狎  
主中無霸王蠻戎振旅始闔閭以信威終夫差以極武

左與勁越同壤右與強楚為鄰內有高臺之築外有遠  
畧之勤積如莽而暴骨亦如讐而視人是以疆場日駭  
板築未弭方五載而厥成造中天而特起因土累以臺  
高宛嶽立而山峙或比象於巫廬之峰或倒影於滄浪  
之水悉人之力以為榮觀厚人之澤以為侈靡斯實累  
卵於九層夫何見乎三百里俚語有之曰川壅則潰月  
盈則匡善敗由己吉凶何常矧謀主之賜劔若涉川兮  
無梁以為棲越以求霸卒見秦吳而受殃客自南鄙觀

乎江濱徘徊舊德惆悵前聞試遊目於寥廓曾歸然而  
參雲聽逆虐而翳諫竟麋鹿而為羣高天放曠平湖決  
漭奕奕孤嶼茫茫極浦悲早鴈於海風嘯寒鷓於江雨  
況復關梁坐隔羈旅增愁山木將落汀葭亂秋思美人  
兮何處獨懷邦兮遠遊彼名遂以身退顧與范蠡而同  
舟東吳王孫有醉其容因少為唱曰中心不必兮子晉  
何為懷直道而驟諫遭重昏之見危將漁父以抗跡且  
垂釣於江湄高臺既傾夕露沾衣感蒞國之不及冀來

人之與歸者也

姑蘓臺賦

宋 崔 鷄

崔子勸學少間與客游於橫山之下有臺巋然出於羣  
山荒基峻級高切雲間荆棘為之蒙翳麋鹿為之迴環  
余語諸客此何所也客曰子不聞吳都之壯麗乎造姑  
蘇之高臺臨四遠而特起此其遺址也余乃倚杖而立  
喟然而嘆曰蓋聞吳王之築斯臺也受鄰越之貢竭全  
吳之力千夫山吟萬人道泣三年而聚材五年而建立

佩茂苑於長洲帶濬池以朝夕自以為天下之奇觀也  
而今安在哉神材異木飾巧窮奇黃金之楹白壁之楮  
龍蛇刻畫燦燦生輝而今安在哉於是與客偃偃而上  
抵其上之絕嶺快四面之遐覩南望洞庭夫椒之山湖  
水澄澈其名銷夏灣者吳王避暑之所也北望靈巖館  
娃之宮廊曰響屨徑曰採香者吳之別館西子之遺蹤  
也其東吳城射臺巍巍其西胥山九曲之逶至於興樂  
有城玩華有池走狗有塘鬪雞有陂猶不足以克其欲

也又侈斯臺以為娛嬉嗚呼雕楹鏤檻者丘墟之幾也  
九層百仞者汙池之漸也瑤臺作而夏衰瓊室考而商  
危章華成而楚眾叛阿房出而秦人離斯喪亂之必然  
曷吳王之不思也哉方其酌醪醺賦珍羞置酒若淮泗  
積肴如山立其宴樂固極矣而不知會稽之上飲食嘗  
膽方焦思而深謀旁籠西山俯視太湖憑高望遠三百  
餘里其登覽固廣矣而不知笠澤之畔銜枚仆鼓忽潛  
軍而夜濟是以橫塘之浦僅通而越來之溪已逼高下

之築未乾而勾踐之城已距於咫尺矣詞未竟客悵然  
曰已矣乎古往今來遼矣悠哉蒼煙兮滿目舊事兮飛  
灰幸江山之不改兮後之人當有鑒於遺臺

古銅雀臺賦

唐張鼎

伊昔三方列峙惟魏宅中五都分設因鄴為宮北走邯  
鄲燕薊南馳鄴衛河潼於是聖武欽若啟戎締經國之  
初構立濟世之元功受命而創洪業取威而定羣雄土  
德王始矣靈告終天滅漢歷國封魏公黃星徵於分野

素秋建於茅社諏良日兮御靈壇坐千乘兮馳六馬錫  
彤弓兮張海外受金印兮安天下不飭不美無以壯哉  
營宮營室是為王者乃僞梓匠掄環材伺農隙悅子來  
六府垂象制文昌之廣殿百工獻藝造銅雀之高臺壯  
閭闔於昭回軼沆瀣於煙埃俯臨而漳滏水合仰觀而  
宇宙天開返道截梁兮漫延紅移縞壁兮徘徊連雙闕  
於日表飛累榭於雲嵬崒如五岳干霄而岌立對若三  
山出海而崔嵬金雀踞甍而欲翥玉螭盤柱而將迴名



詞人於華屋留舞客於瑤杯登高必賦無遠不該泊乎  
鞠旅邛笮反旆咸洛雖納漢以吞江終頽山而擠壑遷  
神於建始之殿返葬於壽陵之郭慷慨遺文淒涼舊閣  
罇盈玉座燈映蘭幕婕妤妓人鼓舞歌唱當春月而朝  
臨悵日暮而西望見松栢之成行愁歌舞之相向異哉  
戰雖必克愛亦有捐戰可以力勝愛難以威全撫四子  
兮魂斷念六宮兮涕漣何壯圖之天闕而閨思之嬋娟  
紆曲念於弊履昏威德於繁絃非達人之所擊豈至尊

之宜然歲月其除君王安在出入三國芟夷四海號謚  
殊徽質文異彩及石氏之謀帝位高歡之竊神器雖脩  
舊而增崇竟移時而改代銅龍噴水似落九天金鳳銜

珠終淪五綵我君遑遑行指鄴旁弔古太息馮高獨傷  
東郊道兮蕪漫西原樹兮微茫露窟吒兮泣蒼蘚風蕭  
梢兮悲白楊妝樓歇豔畫閣銷香陂陀巖岫歸卷摧藏  
井幹滅兮有遺甃殿垣毀兮無華構但見秦秦蒿棘生  
復看齷齪饑饉關雨嘯幽篋月哀離狄宿莽撐骨危巢

覆轂平皋晚，分拱木生寒。紫陌昏兮黃埃奪，晝人壽幾  
何留恨日多追。士衡以投弔效明遠以作歌歌曰銅雀  
蒼蒼對古堦，清風切切有餘悲。試憶望陵三五夜，便是  
西園明月時。

銅雀臺賦

元  
郝經

天斷漢結誕植姦孽董則顛而袁則揭曹氏猖狂銅雀  
魏業既崑崙閉孟門巖三臺見三山截霓斷雲縵重楹  
而走六龍折角徒覺頽地頽空碧甃金鏐直外隆中壯

天骨柱天崩激千里而怒長風如此之富如此之雄而  
操之心猶未充俾漢之天為曹氏天漢之國為曹氏國  
漢之民也曹氏奴漢之臣也曹氏隸漢氏之宗廟宮室  
燼矣而曹氏之列屋長門美矣漢氏之庭寡婦悲曹氏  
之庭媵與妃聆義聲觀義旗孰知其非而操之心猶未  
涯既立海移山分辰斡斗負漢鼎而入魏宮結漢網而  
維魏臺則丕也拜表植也拜章權退備隱琮降表亡不  
愧漢霍光自比周文王四顧無人虎踞而鬼張忘赤壁

之辱誦明月之曲笑吳蜀之僻隘鄙桓文之局促乃上  
重臺入雙闕慨雄姿鼓高節燕歌兮玉糝塵趙舞兮風  
翻雪望二喬而不見怒孫劉之未滅謂我翼莫吾禦我  
角莫吾折彼神器入吾手孰敢撤而裂之哉曾不知此  
世此年守漢宮者孤兒泣血守魏宮者姦雄倚疊也一  
旦懿不忠國昭不義扶濟戈投車龍悲鼎湖則銅雀之  
富魏宮之蓄賊規盜模一為晉所居嗚呼天既不有漢  
而魏復當有天使魏有天則魏之為魏亦昭然矣奈何

魏反不務可作真帝逼君而生拱北以漢臣欺世而死  
征西乎噫欺人者不自見己不欺人人不欺己魏欺漢  
作是臺而不能居晉欺魏獲是臺而不能保臺乎臺乎  
果孰居乎不欺人者其永居乎

銅雀臺賦

有序

元劉詵

建安十五年曹操作二臺於鄴高入雲漢其一治銅為  
鳳凰置馬因名銅雀黃初元年操死臺成未十年計其  
馳騁兵間觀遊之日復幾何哉遺令婕妤美人朝晡上

脯菹朔望作妓樂世以操留連妾婦分香賣履區畫家事傷於纖悉乃平生姦偽死見真情為其心之陋也或者謂不然以為遺令藏其所大欲而徒及家事乃操之微意實為漢賊而身享漢臣之名此固足以窺姦雄心然愚以為操之不遜顯白於世久矣求九錫備儀扈諷陳郡董昭以勸進特以清議未泯遲之歲月間耳不謂不得逞於隴漢歸未及洛而沒蓋平生心事竟不得遂故流涕不自制而寄愛於幼子少妾焉觀其欲嘗設

妓樂及使人嘗望西陵不能割生前富貴如此而肯為  
盛德事乎陸士衡以為長算屈於短日遠跡頓於促路  
斯言得之矣使其未死彼固不能忍以待其子也又豈  
乳北海荀文若之清議所能劫哉作銅雀臺賦

出相州以西鷺兮澹落日之榆堤青山如浪而四走兮  
麥田田而陵陂飛鴻去而杳杳兮寂人家其掩扉荒敗  
礫之草生兮為銅雀之故基問興廢而下馬兮故老告  
予以不知嗟阿瞞之鷹揚兮偉一代之雄姿以迴天倒



日之爲力兮果何強之能支攬英豪以自翼兮才各適  
夫所施每磨盾而作檄兮亦橫槊而賦詩由意氣之溢  
出兮傲甲兵而笑嘻搜六合之名材兮起銅雀之崔巍  
俯雲雨之在下兮招飛仙而遇之高鳥度而畏金碧兮  
行人睇而愁思啾絲管於天上兮天風散而浮雲悲席  
不溫而介馬兮曾登覽之幾時哀短日之不待兮徒以  
施乎總帷執姬侍以荏苒兮又孰知其雄心之獻獻以  
愛子而託人兮彼豈願於崦嵫盛妓樂以嬉死魄兮固

富貴之未忘豈不知在其子兮誠一念之未償奄天運  
之至此兮銷平生於哀腸嗟後來之議論兮舉不究其  
所藏慨睨鼎之旋踵兮曾不如獅子之長西陵瞰乎高  
原兮莽疑塚之蒼蒼高臺落而為土兮曲池咽乎蜚螿  
獨遺瓦之在人間兮尚磨涅而不忘論斯人之自樹兮  
固其功之孔隆何羣雄之蝟起兮由立已之未公譬吾  
身之來盜兮又以摧盜而為功矧不可以控搏兮未若  
秉乎厥衷耿予心之躊躇兮託餘悲於林風

銅雀瓦賦 有序

元 楊維禎

金華劉仲車得是瓦於里毗體半存且廢復完以膠漆  
背有銅臺字左右篆銘有涪翁記云艾城王文叔為涪  
川守得此於深水允謂古匪謬故予為賦之

客有陶唐氏甄名來自鄴下與會稽楮先生論交先生  
曰子辭高而卑去合而分偃傲雨露讒避風雲將涇泳  
聖涯濟嚙道真其出處得失之大故亦可得而聞乎甄  
曰唯唯惟漢建安大將軍操挾天子威芟夷羣盜瞻彼

雒京宮室咸燒燼茲鄴土新厥層構殆將追始志於燕  
東談詩書而訓甲冑也予泥塗之人稼穡是利大鈞有  
造適用於器以為太柔則坯太剛則甑和我以丹鉛濟  
我以火齊不剝脫不砥礪而出我於成削繇是躡雲梯  
登金雀翼觚稜以特峙軼埃壘之混濁與燕黃金以爭  
高吾之承魏恩者亦不薄矣先生愀然曰與枉而搏寧  
直而蟠蹈海絕秦耕野傲燕彼卧龍所不事石羯所不  
為非許月旦所評之姦乎予不登明堂上靈臺則已而

何立鼎峙乎中州冒九錫於其間凌霄漢其若此故不  
如監門而抱關甄曰馬旣負乘雀亦告災嗟我鴛侶碎  
礫飛灰有幸不幸璜沉璧理解予逃難謾何取材陵遷  
谷易甘遊不諧越八百其歷而起我於深水之涯太守  
拾遺如獲涓潭太史審衆如見傅巖青黃溝斷律呂爨  
焦千年瓦礫一日瓊瑤陶弘通譜撲滿絕交歛者包羞  
端眼獻朝直筆如杠斂鈔泮鉞泓然所藏咳唾成章誅  
姦不死發德彌光非吾斯文之一大昌乎先生啞爾曰

大節一折萬事瓦裂雲斬其佞蘇泣其別吾子既創高  
危宜悟明哲毀身削名埋照食潔又何聘几席之貴資  
筆削之直老忠義之研磨將何辭於孟德子殆為銅臺  
之罪案於穎獨無泚而面獨無墨乎甄色如土不敢作  
聲扣之復鳴曰甄實頑鈍未周規矩多壽斯累懷璧而  
賈閱西陵之傳舍僅四紀而弗有舍金華之仙伯復流  
落乎誰手忽暗投乎渠儂孰為甌而為玖分甘與破甑  
同棄而老甌同朽投膠漆以自堅又為卯金氏之友也

先生蹙然曰汝補漏於一方孰與同文於天下也賣恥  
於故國孰與尸解於九土也取弔於騷人孰與忘言於  
老圃也義士絕餐孰回西山故侯不名孰奪東陵為子  
計者野雞拔尾林鹿闕聲又何起缺足於半士志折脅  
於客卿魏既失之而弗能有黃既得之而弗能留自謂  
求田而問舍又崛強而依劉徒知三獻以為寶未知一  
毀而解仇者歎已矣乎噐以名而累形兮名以盜而亂  
實非夫人之具眼兮孰封黥而謝筮豈擲地而金聲兮

猶未忘於瓦礫削款識與瘞文兮庶還初而返質甄乃  
蹙然而起退而徼中書生紀先生之纂述

三臺賦有序

元許有壬

至正三年九月二十四日有壬偕明初馬徵君遊三臺  
明初有長句既次其韻詠歌不足又作是賦其辭曰

歲癸未秋九月霜清寒薄天宇澄澈途無長泥庭有積  
葉高陽子逸興作呻畢輟趣膏秣事登涉壺清露之芳  
醞從白眉之佳客乃度清洹稅駕乎鄴覽山川之形勝



弔陳迹之未滅客乃指顧而告曰子亦見夫三臺巖薛  
者乎冰井峙北金鳳距南銅雀巖巖中立而三若稽作  
者振古所慚欲祛我銜不能縷談子亦欲聞其凡乎高  
陽子曰嘻昔有途巷話古事及漢季小兒聞曹敗則大  
喜劉蹶則擗蹙而出涕蓋人心天理之所同况怒其人  
而履其地因其迹而聲其罪不亦宜哉客乃言曰吉利  
之生姓不自知由嵩已冒夏侯何稽舞戟御捕啖葛如  
飴誑叔以疾拒客以泥睥睨一世岸然肆欺雖橋河之

見異卒莫逃子將之譏謂興義以寧國致羣材之景隨  
爾乃劫遷乘輿地尊天卑彝倫攸斁大廈以隳及乎袁  
尚旣敗審配亦摧黃星斯應赤精遂微入鄴領冀州之  
牧中天植不臣之基慮幾人之稱王乃居之而不疑幾  
筭幾杵成茲崔嵬子午梁貫愈出愈奇三山鼇戴雙闕  
鳳飛連蕩複道相爲蔽虧累棟山積周軒雲齊陽宮冬  
熙凌室夏淒審曲面勢有巧無遺衡漳浩浩乎其北隆  
慮靡靡乎其西收千里於寸眸萃萬景於一時卷山河

而匪席指風霆其在頤應劉王徐倡酬諷咨登高能賦  
家有陳思父子放志欲長若斯天道惡盈樂極則悲撫  
冲弱之季豹顧婉變之蛾眉語託人而哽塞惟泣血之  
漣洒痛富貴之長遠遽盡露其情狀彼一牀之八尺容  
幾許之總帳要脯精於朝晡競聲樂於朔望分香衣而  
造履組舉瑣瑣於屬纊其橫槩賦詩之雄發壁弒后之  
威奄忽而俱喪匪不及乎篡代丕蓋默定於主鬻鎖諸  
嬪於幽閨望西陵之莽蒼念舊寵而興悲抑茹怨而自

愴霜鴈訴秋露花泣春宰木行拱几筵有塵哀絃急管  
其聞不聞事往迹存如惡不泯夫以精舍二十年之規  
欲媒蘖萬年之為君不知司馬家兒已瞠乎其側而恥  
於附其翼攀其鱗也徒為趙燕韓魏齊之張本因之增  
侈重困乎吾民幸疊嶂之不鏟俾表惡於無垠今吾與  
子效小兒之顰蹙申欺孤之公議傾壺中之清醇澆胃  
中之醜名且以酌漢室征西之將軍魏家創業之武帝  
子以為何如高陽子聞而笑曰瞞乎瞞乎如客之言則

爾之罪窮天地亘萬世而不可貫矣然誅則以心論言  
不以人廢乃歌其歌曰對酒當歌人生幾何憂思難忘  
唯有杜康於是引滿竭壺興盡而返回望三臺渺蒼茫  
乎醉眼

燕昭王築黃金臺賦

唐張式

燕昭以齊魏躡武楚趙專征地僻援寡城孤勢輕體未  
遑於安席心每寄於懸旌外矜嚴以示懼中慷慨而不  
平欲羅天下之彥總海內之英爰築臺於國以尊隗焉

名知夫喬林之木可選他山之石可轉將在物之非珍  
謂求覽之不顯苟白駒之可繫信黃金之可賤且設而  
為己則以奢設以為人則為善友然既就赫矣斯存象  
徘徊於前殿色晃朗於朝曦人所貴惟金我以為土時  
以士為賤我以為尊誠列辟之未制掩前經之所論昔  
銅雀創於鄴都陽臺起於荆國聳高麗之殊觀備珍  
奇而盡飭徒竭用而殫人自矜豪而逞力洎夫遺情總帳  
徒愴淫心結夢巫山空資穢德豈同夫慮成經始所寶

惟賢初假物以求士終得魚而忘筌不然者鳥將棲於  
茂樹魚自躍以深淵臣亦效誠於大國人遠誰仕於弱  
燕所謂興亡必繫於賢哲勝負寧由於衆寡庶斯焉而  
取斯誠大者而遠者及夫劇辛不召而至樂毅無媒而  
萃咸委質而納忠願長途而騁驥然則賢為強國之器  
臺實招賢之餌空悲霸業之雄不覩濫觴之自異乎哉  
歷萬古而共觀信諸侯之一致後之士寧無郭隗之才  
後之君但守燕昭之位是以千乘雖貴一士雖微必禮

之而後為用必求之而後能歸不可誘之以利不可劫  
之以威因酌古以道意惜臺平而事非

燕昭王築黃金臺賦

以殊禮釣士克  
昌其功為韻

唐

獨孤授

戰國之分裂寰區境削兵抑者不惟燕子昭王乃卑身  
以勤德懷霸業之遠圖伊取士之或異及成功而莫殊  
抗珍臺而臨碣石廓賢路而走幽都表之以高居尊之  
以厚禮曷云成土木之弊適以備股肱之體於是雲竦  
山峭穹崇竄窳架塊坻以上馳飾金寶以內照泛易水



之浮景蔭尾星之垂耀是為層構臨而時傑臻亦猶甘  
餌懸而巨鱗釣展禮於此感之在彼降其尊以奉其卑  
豐於物而薄於己臨燕薊之衆目傾齊趙之奇士士之  
得可霸其將四海有焉士之失且亡豈直千金而已然  
則作為臺館實耗財力始若勸人終能肥國宋歌澤門  
以歸怨燕尊郭隗而耀德苟順動而若斯尚何求而匪  
克義積道光聲馳風揚羣材並用墜業乃昌屈於一人  
以釣士則開霸而圖王侈於一臺以釣國則兼大而稱

強誠異虜其臣而必弊瓊其室而是亡且惟臺則沒矣  
代如何其繇邈千載蒼茫一時孰為來者曾莫嗣之國  
是其興鑿黃金之豈怯賢如可得下白屋而寧辭故九  
九之術不棄齊桓以成功善善之道克廣燕昭以垂風  
用能首五霸冠七雄抑未有為國而失士可據盛烈於  
無窮

燕昭王築黃金臺賦

唐韓徹

伊君有燕國隘朔邊當昭王旁求致理遇郭隗自舉推

賢乃曰人思爾得禮由我先既築高臺所損者寧辭百  
鎰斯為下士效死者何啻三千苟柱石之來助冀土宇  
之獲全原夫累土足階披沙何損勢迨迨而迴出價洋  
洋而彌遠寧同戲馬興誘勸以立基有異思仙得富強  
而為本爾乃經營是設積思方成敬危既差於九仞委  
棄自多於一篋潛思潤屋之謀寶不足貴遠得利國之  
術賢豈能輕所以士因臺而取重臺因金而播名振一  
時之德美傳萬古而風清是則厥狀足徵斯義可考孤

峻上符於臣節崔嵬下瞰於王道將昭千乘繼文侯忠  
良為心未敢一言得季布誠信為寶所謂南金置而非  
重北方倚而自強來側陋以畢至歷磴道而可常乍激  
天風還如擲地之響斜臨都邑更同懸市之光想夫典  
刑有準聲教可則若周室之稱靈似殷鼎而在德穹崇  
可仰權謀實自於一夫綱紀更張威刑遂加於四國豈  
比夫銅雀美於魏日章華侈於秦時顧凌雲之小者何  
積瑤而方之今與燕非匹惟唐接踵康衢絕扣角之詠

仄席無築臺之罷顧斯賦之至微安敢為重

黃金臺賦

元 楊維禎

懷美人兮天一方曰燕然兮故邦耿寒照兮析木黯雲  
蕪兮武陽瞻崇臺之千尺兮敬弔昭王南山松栢兮度  
材孔良載揀載椽兮厥土燥剛上千瀕洞兮下鎮鴻龐  
出沒塵霧兮蔽虧景光增黃金之改觀兮聳具瞻乎四  
旁吾不知壯麗之所出兮曰聘士之皇皇嗟甘棠之子  
孫兮胡崎嶇於蠻貊鍾噲之之遺禍兮受強齊之控扼

嗜若虓虎兮威若雷霆蹇吾冲之嗣祚兮哀力單而勢  
輕弔遺黎之疾苦兮銜前人之憤烈思英雄以其奮兮  
庶國恥其可雪千金一擲兮聘席之珍尺璧非寶兮寶  
於仁人市遺骨以招駿兮續龍媒其奮趾劇不召而自  
至今鄒聞風而亦起毅委質以駿奔兮車來輕於千里  
蓋一誠之感激兮固非黃金之所餌也寶鼎九廟兮金  
城四壁大邦懷勢兮小邦畏力振吾旅於臨淄兮迫窮  
寇於莒墨齊器設於寧臺兮故鼎返於磨室洒九京之

宿憤兮誠一時之偉績也嗚呼鹿之臺以賄敗兮瑤之  
臺以侈亡雲夢蕩乎游盤兮姑蘇鶴乎內荒戲馬郤於  
剌印兮銅雀泣乎分香哀章華與望海兮踵神明與栢  
梁編以金玉兮絡以綺組羅列垂棘兮錯落玄圃國士  
一空兮禍國之府想昭王之清風兮增激古之慨慷去  
千載如一日兮金之臺至今其有耿光嗚呼噫嘻望碣  
石兮山峩峩涼風蕭蕭兮易水波訪故址兮何在招  
望諸兮悲歌易可竭兮碣可磋高臺之風兮不可磨

金臺賦

明劉定之

眇平野之坡陀鬱孤臺之峻起無置金之遺藏有定鼎  
之雄峙匪偏安於一隅實建極於萬紀但見夫天垂蓋  
以覆遐荒日碾輪而行高軌臂太行以右盤面長河而  
東委參差繚繞萬雉之城兮附以民居之蜂蟻嵯峨巖  
峩雙鳳之闕兮守以周廬之虎兕煌鉅晶熒樓殿之入  
雲兮盡交疏而結綺玲瓏雜沓車蓋之滃霧兮悉紆緋  
而衣紫悵勝地之靡常兮今既足以踰初而賢哲之總



會兮彼亦奚能望此偉燕昭之好士兮亦戰國之賢王  
思攬英而結俊兮期財富而兵強崇九仞以立館兮傾  
千鎰以承筐是宜其效用盛而垂烈光然吾考其所就  
兮豈桓文之敢方彼郭生之自舉兮幾銜玉而要價紛  
羣豪之踵至今咸越國而命駕信望諸之材武兮宜取  
威而定霸奚君臣之齟齬兮事垂成而狼藉使玄社之  
弗競兮陵夷衰遲終不免於督亢之畫較其所建立兮  
亦不足為管晏之亞噫嘻兮可遠想而長嘆哉光岳之

合而分分而合英雄之生而死死而生幾虎爭而龍鬪  
幾鴉噪而狐鳴金臺兮頽然礙朔風映夕陽藤蘿挂苔  
蘚荒以閱此世之茫茫迨夫道泰時寧乾清坤厚堯舜  
文武於焉握符闡珍周召皋夔於焉鳴玉曳綬德與臺  
尊業與金富而凡觀光之士擢秀之魁皆欲依日月轟  
雲雷豈但使斯景託摹寫丹青之手吟咏宮商之才也  
哉

問津臺賦

唐鮑防

惟歲臨乎甲午余經蔡以遊陳見歸然之故臺沒路隅  
之荒榛側聞夫子於此問津敢問夫子何負於人栖栖  
夫子魯不容身乃泣然而出涕聊託辭以自申玄黃之  
初萬物為銅形象既著造物無功匪伊無功不宰其中  
禮樂之初崩壞未正詩書既出夫子無命匪伊無命不  
耀其聖向使魯同季氏齊等田常貪浮雲之不義忘  
夕露之瀼瀼豈無十室之邑亦有三家之堂莫自衛而反  
魯毋因窮於路旁浩浩其天茫茫其野近不見於文武

遠不逮於虞夏彼通津與直道故無得而知者已矣夫  
子時乎時乎進昏鳥獸之羣退異沮溺之徒霜雪昏其  
大澤荆棘穢其通衢撫川陸之嶮難憫人世之崎嶇方  
太公迷殷遇文王伊尹迷莘遇成湯何夫子之不遇處  
昏濁而遂亡永追想於遺迹遂投弔於寒荒

望思臺賦

唐 陳山甫

漢武帝以惑亂生聽衛太子以危疑出奔始誤讒諛之  
巧長遺覆育之恩高臺有揭悔過無門我我九層已斷

興哀之日眴眴千里不歸幽憤之魂嗟乎望以窮高思  
以及遠為父之慈靡及恨而莫失為子之道既乖慙而  
勿反當其版築初設土工聿脩旁窺日轉下視雲浮所  
以取其遠無不鑒近無不周導宸衷於曠望表玄思之  
殷憂豈比夫栢梁為耳目之翫通天窮汗漫之遊流盼  
無涯增懷永久意來思之可待念追悔而終不事殊子  
飯空引決以自傷跡異申生諒為孝而何有悲夫見危  
致命有去無歸誠一朝之愈斯極豈三年之恩可違於

是跨層高之杳杳屬遠思之依依俯游雷之音常思出  
震仰列星之象猶戀重輝豈知登臺有悼往之心陟岵  
無懷歸之歎曉光東上含萬恨而意深暮色西沉向四  
隅而望斷徒勞乎積財厚地累土長空想迢遙於玄圃  
悲寂寞於青宮鑒失聰明將後悔而何及臺高雲漢自  
貽咎於無窮原夫義絕君親禍由臣僕致兩傷於疑忌  
在一言之所黷是臺也可以申鑒於後王豈徒處高而

縱目

望思臺賦

唐蔣 凝

路入湖邑臺名望思幾里而雲瞻累土千春而草沒餘  
基仙掌一峰遠指江克之事黃河九曲旁吞武帝之悲  
昔者漢祚方隆皇綱失理因平蠱之事作有讒邪之禍  
起宮中既得其桐人臣下皆疑於太子龍樓獲謗方儲  
副以難明鳳閣無恩遂出奔而至死保傳徒爾園陵在  
哉千秋感悟萬乘傷推齊誅子糾以無道晉殺申生而  
可哀於是憑大野築高臺目極心存知繼體之何在夫

長地久庶招魂之一來緬彼沉寃登茲極望英靈無髣  
髴精魂立隴有蕭條情狀見舜井以咨嗟念羸博而惻  
愴煙昏日慘全非望月之中鶴唳猿驚不在通天之上  
帶嶮嶮何裨死生非唯滅天性害人情抑亦傷國體  
敗家聲臨百尺以凝眸終天曷覩向九重而含恨何世  
能平雖然事出妖訛姦生結搆宜北闕之聽君命奚東  
宮之有私鬪子臧在側斯人比鄭叔何殊商洛非遙此  
事亦芝翁不救往昔於金陵高谷深遊鹿而征人舉首



悲君而逋客傷心曰子曰臣可念茲而誠勵為君為父  
宜到此以沉吟且王者為域中之大太子是天下之本  
何周公之不法而秦相之可損吾欲碑戾園望苑使有  
家有國鑒此臺而不遠

傷望思臺賦

唐陸贄

桃野之右蒼茫古源草木春慘風煙晝昏攬予轡以躊  
躇見立表而斯存乃漢武戾嗣勅命地也然後築臺以  
慰遺魂吁自古有死胡可勝論苟失理以橫斃雖千祀

而猶冤當武帝之季年德不勝而耄及浮誕之士疊至  
說怪之巫繼集忠見疑而莫售讒因隙而競入忘嗜欲  
之生疾意巫詛而是因將搜靈以滌災縱庸瑣之姦臣  
嫌何微而莫售冤雖毒而奚伸構儲后以掛殃引具寮  
與齊人旋激怒而誅克竟奔湖而滅身異哉漢后因姦  
邪之是誘俾冢嗣而罹咎彼傷魂之冥冥故築臺其何  
有嗟爾戾嗣盍入明以見志遽興戈而自棄諒君父之  
是叛雖竄身其焉寘嗚呼一失其理孝慈兩墜不其傷

哉夫邪不自生釁亦有托信其讒興御則妖作恣鬼神  
之愆變實人事之紛錯故子不語於怪亂道亦貴乎淡  
泊蓋為此也水滔滔而不歸日杳杳而西馳時經往兮  
莫追人共盡兮臺隳榛馬莽馬俾永代而傷悲

思子臺賦有序

宋蘇過

余先君宮師之友史君諱經臣字彥輔者山人與其弟  
沆子凝皆奇士博學能文慕李文饒之為人而學其議  
論彥輔舉賢良不中弟子凝以進士得官止著作佐郎

皆早死且無子有文數百篇皆亡之予少時常見彥輔所作思子臺賦上援秦皇下逮晉惠反覆哀切有補於世蓋記其意而亡其辭乃命過作補亡之篇庶幾君子猶得見斯人冑懷髣髴也

客有自蜀遊梁係關而東覽河華之形勝兮訪秦漢之遺宮得歸然之頽基兮並湖城之西墉弔漢武之暴怒兮悼戾園之憫凶聞父老之哀歎兮猶有歸來望思之遺恫吁犬臺之讒類兮實咀毒而銜鋒敗趙國於俛仰

今又將覆劉氏之宗間漢武之多忌今謂左右之皆戒  
殺陽石而未厭今又瘞禍於宮中徂君王之好殺今視  
人命猶昆蟲死者幾何人今豈問骨肉與王公惑狂傳  
之淺謀今不忍忿忿而殺充上曾不鑒予之無聊今實  
有豕心負此名而欲亡今天下其孰吾容苟道死於泉  
鳩兮冀稍久而自理遘大患於倉猝兮懷孤憤於永已  
念君老而孰圖兮嗟肉食其多鄙獨三老與千秋兮懷  
愛君之拳拳犯雷霆之方怒兮消積禍於一言洗沉冤

之無告兮，幾讒人其已晚。幸曾孫之無恙兮，聊或慰夫九原。雖築臺其何救兮，固知己矣之不諫。魂斃斃兮，其歸來。蓋庶幾於復見也。昔秦之亡也，禍始於扶蘇。眇斯高之羸豕兮，視其君猶乳虎。曾續息之未定兮，乃敢探其穴而啗其雛。在晉四世有君不惠，孽婦晨雉。彊王定制，惟愍懷之遭罹兮。實追二於漢戾，顧孱后之何知兮。亦號呼於既逝，寫餘哀於江陵兮。發故臣之幽契，仍築臺以望思兮。蓋援武以自倒，嗚呼噫嘻。可弔而不可哂。

兮亦各言其子也彼茂陵之雄傑兮係九戎而鞭百蠻  
笑堯禹而陋湯武兮蓋將與黃帝俱仙及其失道於幾  
微兮狐鬼生於左臂如嬰兒之未孩兮易耳目而不知  
其地甘泉咫尺而不通兮與武乾其何異一既上配於  
秦皇兮又下比於晉惠君子是以知狂聖之本同而聰  
明之不可恃也覽觀古初孰哲孰愚皆知指笑乎前人  
而莫知後之視予方漢武之盛也肯自比於驪山之朽  
骨而況於金墉之獨夫乎自今觀之三后一律皆以信

讒而殺子暉姦而敗國吾築臺以寄哀信同名而齊實  
彼昏庸者固不足告也吾將以為明主之龜策自建元  
以來張湯主父偃之流與兩丞相三長史之徒皆以無  
罪而夷滅一言以就誅曾無興哀於既往一洗其無辜  
獨於據也悲歌慷慨泣涕躊躇嗚呼哀哉莫有以楚靈  
之言告者曰人之愛其子也亦如余乎天道好還以德  
為符惟孟德之鷙忍今以嗜殺以為娛彼楊公之愛脩  
兮豈減吾之蒼舒恨元化之不可作兮然後知鼠輩之



果無同舐犢於晚歲兮又何怨於老臞吾將以嗜殺為  
戒也故於末而並書

釣臺賦

宋朱翌

導桐川而西驚發清興於孤蓬覺水石之益隘疑滄江  
之路窮入壺中而天高渺煙霧之溟濛三老刺灘高絕  
力殆猶蹈香林八節之峻而驚夫呂梁百步之洪也循  
江而上古木千章山如掩屏水若奩鏡雲氣往來而舒  
遲竹松堅瘦而鬱蔥遠而望之物象之平淡豐腴也其

下必有石蘊奇璞淵涵夜光不然隱士高人之所棲止  
游從者邪忽兩崖之對峙摩萬仞之蒼穹舟人指而告  
予曰此漢嚴先生子陵之所從釣魚者也罷漿落帆淪  
湯注茗再拜三奠顧瞻千古之高風昔西京之中微動  
新室之饗興封豕長蛇恣啖百姓百姓之怒盤天糾地  
無以挾其憤憤之曾偉白水之真人忽乘龍而馭雲傾  
天河而洗六合回炎歷以再新天下定矣橐矢橐弓垂  
衣拱手晏然端居於九重思我良友未知何之披羊裘

而釣於澤中者是耶非乎安車前道玄纁及門三聘而  
來握手道舊考文叔之心猶非天下之至仁也四五年  
間沐雨櫛風親冒矢石躬擐甲冑則亦貪夫黃屋之至  
尊樂夫天位之甚崇取神器如此之力又安肯捐天下  
以與賢故其曰使真成帝尚不可得其視唐堯許由固  
知必不能同也下而三公之位加以大國之封與絳灌  
以並列則吾將乘桴而入海又安能俯伏跪起束縛以  
黜散草蟲也人之生世如夢一覺枕膝且臥而文叔不

曉聊加足於帝躬在天固以為客星矣下視世間亦聚塊積蘓爾時出光景不意驚動夫漢庭諸公也惟彼東南有江有湖有龜有魚放意煙波之外吾生蓋已有餘矣風晨月夕竿線在手不避世以為高不鍊形以為久優哉游哉深入鷗鷺之羣而得計魴鯉之數也有磻溪之老人以垂白之衰容顧其鈎而莫鈎特見夢於非熊使文王開丕顯之基並十人經濟之忠豈先生之好異蓋不能作偽於書章教民以相攻也嗟世路之愈迫悵

人之慕鴻終結茅以為鄰日香火之是供清泉白石  
聞此言於樂天曉猿野鶴計不怨於周顛也

釣臺賦

宋 滕 岑

有磐其石屹雙峙兮石形如壇匪層累兮萬木森森衛  
其址兮其上圓廣平如砥兮高摩雲霄下臨水兮仰者  
目眩登者悸兮問開此境伊誰始兮漢士光名莊其氏  
兮後易以嚴避國諱兮中原傲擾身轉徙兮愛此山川  
遂家此兮二石乃其所游止兮釣以寓意非垂餌兮維

時矣運偶中否兮真人起握天子璽兮掃除六合清無  
淖兮搜巖剔壑求梓杞兮棟梁之負歸器使兮先生實  
為天子友兮物色尋訪得之喜兮屈帝之尊與同寐兮  
庶幾吁俞肯共理兮翻然徑歸隱幽邃兮我則棄彼非  
彼棄兮嗟哉先生此何意兮自漢至今孰可企兮相彼  
影附權與勢兮蒲服奔趨比奴隸兮睢睢盱盱希唾涕  
兮紙痔得車而不恥兮矧夫故人登寶位兮談笑可得  
富與貴兮澹如不聞亦不視兮與世相去幾萬里兮紛

紛稱頌高其節兮猶以光明舉日月兮妄庸議其處與  
出兮無異井蛙談溟渤兮先生二言在簡冊兮其言千  
載猶煒燿兮懷仁輔義天下說兮阿諛順旨要領絕兮  
人佩此言比環玦兮始能無愧於臣列兮此而不知餘  
何說兮舟過臺下來弭楫兮身為聲利所羈縲兮欲持  
何顏見像設兮客星煌煌在天闕兮塵土胡為溷其潔  
兮汝自顙泚腸內熱兮

釣臺賦

宋 徐夢莘

釋扁舟之維纜兮爭嫫女之長風循蘭皋之東駛兮先  
蒼日之飛鴻忽重山之效勝兮得子陵之遺踪羌舍舟  
而徑造兮歷釣臺之宮崇昔岌業以對峙兮面馮夷之  
幽宮四無人之深邃兮白雲簇而晝封故先生之釣此  
兮晚鐘鼎於鍼鋒觀昔人之棲隱兮豈誠心於避世排  
天門而無豐隆兮遂垂翅而遠逝苟左右為之梯級兮  
紆青綸而焚芟况故人之龍飛兮亟攀鱗而掉厲眷文  
叔之久要兮握赤符而御人託儀容以搜訪兮冀物色



之可循幸羊裘之一來兮略陞楯而情親雖紳笏不可  
以羈鞅兮亦振鷺之為賓何倏來而決高兮堅素履而  
莫臣豈仁義不我與兮卒卷道以周身抑黼黻非所好  
兮寧擁蒲以自珍吁吾知先生之有道也始文叔之謹  
厚兮實姁姁而多愛擲一勝於乾坤兮艾羣雄以如芥  
視天下之莫我撓兮遂哆然而自泰彼馮敬通之賢且  
碩兮妄一昔之為外惟三公論道以密勿兮東以吏能  
之煩碎阿符讖以自詭兮漸正道之蕪隘非先生矯厲

於逕庭兮孰祛夫帝心之用大故以吾身為準兮渺浮  
雲之不留視秕糠於富貴兮若將澆而焉求視負賤之  
驕人兮非勢利之所讐加予足於腹兮不少跼於昔游  
欲帝知先生之不屈兮則九有德者不可媮儻凝量而  
不愠侮兮庶兼容於九州非先生之要漢兮實為漢之  
遠猷肆觀層臺璀璨何久豈金椎之益固由高風之不  
朽歷漢唐之千年配不刊之岡阜彼章華與姑蘇非不  
高而且厚曾歌舞之未終紛狐兔之交走雖物理之成

壞端夫人之自取嗟予行之未已冒名利之塵垢仰先生之清節覺予形之甚醜將洗耳於寒瀨酌叢祠之杯酒借先生之竹而坐先生之臺殆與之相為先後

釣臺賦

宋 陳巖肖

泛富春之極浦過桐君之所廬山環翠而繚繞溪瀉練以縈紆平林絕岸或斷而或屬朝霏夕靄乍歛而乍舒湍聲激煙峙之下嵐色貫雲岫之隅忽一峯之森然鬱蒼蒼而倚天粵嚴先生之舊隱聳巨石乎雲端踞此磯

而坐釣抗斯志於當年高風作塵不可幾及兮遺踪逸  
躅至今而獨傳方其披羊裘於澤中兮甘肥避而自悔  
光武物色而聘之兮逮三反而始至吐危言以戒侯司  
空兮不改狂奴之故態傲萬乘而恃故人兮動星象而  
罔有愧竟拂衣而去之兮卒老於丘壑而不悔惟卯金  
之中否兮賢哲括囊而遠逝暨真人翔於白水兮爭幡  
然以赴功名之會何先生之遠引兮了無意於斯世豈  
時君之不可輔兮似立志之近隘稽往牒而知其心兮

蓋有激於斯時嘗欲懲西都之弊兮遇功臣之禮或虧

課三公以吏事兮繩之法而示威輕轉易其守長兮聽

諛言與單詞近臣或拙撲牽曳於其前兮蹈矯枉過正

之非朱浮鍾意之屢以為言兮咸納忠而盡規宜先生

逆料其必然兮抗高節而豫警之遂律貪而立懦兮共

扶漢祚而不遽衰也昔渭濱之釣璜兮釣功烈以輔興

王之基闕里釣而不網兮釣道德以垂萬世之師濮水

釣而持竿不顧兮釣高尚以遠塵俗之羈兮先生亦寓

意如是兮釣氣槩而挺然不可隳也遂倡東都之士輕  
外慕兮俱耿介以自持也則知聖賢所遇雖殊兮其持  
立以表世者舉非偶然而為也故此屹然之釣石兮千  
載聳觀瞻於桐江之渚也

釣臺賦

宋范浚

歲辛丑予東歸兮凌濤江之渺瀰引帆席而朝發兮夕  
予次乎嚴君之祠惕仰高其若存兮揆厥意而明之曰  
先生之遭世兮會炎正之中微恠餘分之孽虐兮方悖

道而窮威率誅忠而任殘兮紛紛亦車之四馳蕩三綱  
其弛絕兮誰裂冠而去之宜先生之高蹈兮靜游釣於  
淪漪值赤符之膺運兮矯白水之龍飛彼羣雄之疏附  
兮猶響臻而應期何故人之雅素兮翻固拒而牢辭惟  
先生之高介兮氣干霄而上躋恥一毫之或挫兮若捷  
市之忸怩彼君房獨何人兮將使我自屈而詭隨荃不  
察予之口授兮顧狂奴之是譏視蒲車之來思兮類被  
毀而遭非蹇儒仲之耿耿兮繫俗黨之貽訾伯兄願脩

於初服兮幾偃蹇而見擠既讒巧之孔多兮予又胡為  
乎遭迴寧超超以遐逝兮亦安能依世而突梯意先生  
之達識兮不降志其由茲吁嗟器大時難容兮追巢躡  
由邈儼蹤兮水之渾渾山崇崇兮遺芳不泯名益隆兮  
何千萬年激頽風兮死者如可作惟先生之宗兮

釣臺賦

宋程珌

予與客泝富春之流入新安之區舍舟即山將遊乎嚴  
子陵之釣臺客曰詩詠考槃易嘉肥遯洗耳波長嚼薇



味在或荷蕢而歌或濯纓以喟或彈北窗琴或負南疇

耒或逃去無名或歸來適意或託以酒狂或隱以詩貞

或膏肓泉石或生死絲綸今昔之士何啻千百輩卒與

微塵斷梗以俱湮而子陵標榜獨到於今耶且吾與子

初而學壯且行之莘野磻溪翻然來思而又烏取乎隱

者之所為乎予笑不荅客亦不言遂相與攀蘿側足登

乎釣臺之巔拂蘚磴以危坐訪幽蹟以遐觀壁立巍峩

之石下接魚龍之淵險萬折而忽平逼象緯於曾關其

旁則重巒複嶂氣象紆環雲魂霧魄棲舍其間鳥啼畫  
靜泉落涓涓古藤曲蔓陰森夏寒怪木千章天矯龍蟠  
幽壑噓風空江浴蟾其下則萬頃寒濤回伏奔翔擾擾  
層波三軍騰裝川后怒靜素練拖江日薄沙晚風帆浪  
檣一徑接溪草綠汀長維時秋也快清風之颯至喜晴  
天之開碧瞰危崖而笑語起老蛟於淵蟄頓足望乎八  
荒使人飄飄然而氣逸於是解瓢酌酒晉酌於先生曰  
嘆哀平之不弔兮人人嚮漢以求官與天子有廬江之

素兮乃老百年於釣竿山林鼎食各有意兮未易論古  
人於形骸之間既而與客醉卧於石舟人驚報潮來船  
發

登釣臺賦

明 王世貞

己己之秋季月稍魄余所偕邁者金華括蒼之伯指桐  
廬下建德芊眠衣雲嬋娟繡壁飛湍激流千丈縹碧澄  
渟皎鏡下數白石於時鴻濛就冥鷁首忽辨桂輪少虧  
金波騰絢恍見一峯縹緲於空喬連岡深安而拱獻森

參厭應巖阜回緬洪濤鼓兮木末流泉激兮石間中宮  
叶商拊節迴環余所停憩二客解顏舟子指焉曰此故  
嚴光先生灘也余乃野憤而楚服盤跚以前挹寒漿兮  
靡椒薦素琴兮無絃追夫一介之賤微靈誠感而燭天  
遂姓其州而貌其山者千五百年雲臺燼颺原陵蕪煙  
富貴身盡聲華代遷孰與先生宇宙長鮮嗚呼吁嘻彼  
夫赤真中晦紫閨未窮兵起東郡節殉二龔庶幾君臣  
如日麗空妖新截蜃白水興龍藉匪先生君德疇隆土

行重倫立貢驟穹萬歲千秋穆如清風緹纓琴珪以匏  
余躬再拜而退二客是從未既忽有歌聲起於蘆際夫  
眇鏗厲林木盍沸其辭曰滄浪之清可以濯纓渭川釣  
利桐江釣名役心成跡強性之情孰與吾漁無役無強  
織阿為鉤太虛為網冥志沕穆縱神澠朗余異而迫之  
不見其處飄若一縷破東南霧而去

御定歷代賦彙卷一百七